

MALAYSIA
DEWAN RAKYAT
ATURAN URUSAN MESYUARAT

NASKHAH SAHIIH/BAHASA MALAYSIA

<http://www.parlimen.gov>

HARI RABU, 2 NOVEMBER 2016, PUKUL 10.00 PAGI

Bil. 40

PERTANYAAN-PERTANYAAN BAGI JAWAB LISAN

1. PR-1343-L76403
Dato' Haji Abdul Rahman bin Haji Mohamad [Lipis] minta **MENTERI PENDIDIKAN** menyatakan sejauh manakah jumlah terkini tahap kebolehpasaran pelajar kolej vokasional yang telah tamat pengajian untuk melanjutkan pelajaran dan menceburi bidang yang dipelajari semasa di Kolej Vokasional.
2. PR-1343-L77035
Puan Hajah Fuziah binti Salleh [Kuantan] minta **MENTERI TENAGA, TEKNOLOGI HIJAU DAN AIR** menyatakan kemajuan dalam rancangan untuk membina loji penjana kuasa solar, serta lokasi-lokasi yang berpotensi untuk pembinaan loji tersebut.
3. PR-1343-L76501
Datuk Noor Ehsanuddin bin Mohd Harun Narrashid [Kota Tinggi] minta **MENTERI KERJA RAYA** menyatakan sejauh manakah *Building Information Modeling (BIM)* mampu meningkatkan kecekapan kos dan pelaksanaan di dalam projek pembinaan.
4. PR-1343-L76489
Tuan Wong Sze Phin @ Jimmy [Kota Kinabalu] minta **MENTERI PEMBANGUNAN WANITA, KELUARGA DAN MASYARAKAT** menyatakan rancangan atau program membasmi kemiskinan yang dijalankan termasuk kerjasama dengan agensi Kerajaan. Ini penting kerana usahasama ini dapat menyalurkan bantuan bukan sahaja kepada individu tetapi isi rumah yang mungkin terdiri dari orang tua, OKU dan ibu tunggal.
5. PR-1343-L75831
Datuk Juslie bin Ajirol [Libaran] minta **PERDANA MENTERI** menyatakan peranan dan kepentingan pewujudan bangunan Pejabat Daerah Maritim yang diletakkan sebagai operasi logistik bagi perairan Zon Selamat Timur Sabah (ESSZone).

6. PR-1343-L76300
Dr. Haji Izani bin Haji Husin [Pengkalan Chepa] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapakah jumlah kerugian yang dialami oleh Kerajaan dalam kes penyelewengan gas petroleum cecair (LPG) bersubsidi dan apakah hasil operasi Kementerian dengan Pasukan Penguatkuasaan Pemulihan Hasil Negara (NRRET).
7. PR-1343-L75558
Datuk Dr. Ewon Ebin [Ranau] minta **MENTERI SAINS, TEKNOLOGI DAN INOVASI** menyatakan :-
 - (a) bilakah pembinaan Pusat Sains Negara yang pertama di negeri Sabah akan dimulakan; dan
 - (b) berapakah jumlah peruntukan yang terlibat dan apakah jenis kemudahan yang akan disediakan di pusat tersebut.
8. PR-1343-L77115
Dato' Ngeh Koo Ham [Beruas] minta **MENTERI PENDIDIKAN TINGGI** menyatakan kenapa setiap tahun masih berlaku pelajar-pelajar yang mendapat keputusan yang terbaik dalam SPM atau STPM tidak berjaya mendapat tempat di institusi pengajian tinggi awam atau tidak diluluskan kursus yang dimohon oleh mereka sementara mereka yang mendapat keputusan tidak begitu baik pula ditawarkan tempat di institusi pengajian tinggi awam dan mendapat kursus yang dipohon oleh pelajar-pelajar yang mendapat keputusan yang terbaik.
9. PR-1343-L77263
Datuk Wilson Ugak Kumbong [Hulu Rajang] minta **MENTERI KEMAJUAN LUAR BANDAR DAN WILAYAH** menyatakan :-
 - (a) status Jalan Nanga Mujong Ke Nanga Gaat, Kapit ; dan
 - (b) Jalan Rumah Panjang TR Juntan ke Rumah Panjang TR Bengau, Sg. Sut, Kapit.
10. PR-1343-L76214
Puan Teo Nie Ching [Kulai] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kerajaan berniat untuk menggubal undang-undang untuk menghentikan diskriminasi terhadap wanita, terutamanya wanita mengandung di sektor swasta.
11. PR-1343-L76445
Dato' Sri Hasan bin Arifin [Rompin] minta **MENTERI SAINS, TEKNOLOGI DAN INOVASI** menyatakan apakah teknologi yang dibangunkan oleh Kementerian menerusi pelaksanaan Pelan Hala Tuju Strategik *Internet Of Things (Iot)* Kebangsaan dan berapakah jumlah terkini yang telah dibelanjakan serta apakah kesan strategik Kementerian bagi menjayakan hala tuju ini menjelang tahun 2020.

12. PR-1343-L76393
Tuan Zairil Khir Johari [Bukit Bendera] minta **MENTERI PENDIDIKAN** menyatakan nilai kontrak yang dianugerahkan kepada Thinking Schools International untuk menghasilkan i-THINK, termasuk kos latihan, penyenggaraan dan pelesenan.
13. PR-1343-L76027
Tan Sri Datuk Seri Panglima Joseph Pairin Kitingan [Keningau] minta **MENTERI PENGANGKUTAN** menyatakan sama ada petunjuk serpihan kapal terbang yang dikumpul setakat ini boleh ditafsirkan dengan jelas sekarang dan menyakinkan bahawa kapal terbang MH370 benar-benar terhempas di Lautan Hindi dan tidak lagi boleh dipertikaikan.
14. PR-1343-L76995
Dato' Kamarul Baharin bin Abbas [Telok Kemang] minta **MENTERI PENDIDIKAN** menyatakan :-
- (a) penjelasan terhadap polisi Kementerian berkaitan tugas hakiki guru sebagai seorang pendidik yang kini terpaksa menjalankan tugas-tugas pengkeranian pada waktu persekolahan dan juga diluar daripada waktu persekolahan; dan
 - (b) rancangan Kementerian untuk menangani isu ini dalam tempoh jangka masa pendek dan panjang.
15. PR-1343-L77058
Tuan Haji Ahmad Lai bin Bujang [Sibuti] minta **MENTERI PERTANIAN DAN INDUSTRI ASAS TANI** menyatakan apakah perkembangan Program MyBeras yang diumumkan oleh Perdana Menteri dan setakat ini berapakah jumlah pemohon MyBeras yang diluluskan bagi negeri Sarawak dan permohonan bagi Parlimen Sibuti.
16. PR-1343-L76774
Tuan Teo Kok Seong [Rasah] minta **MENTERI DALAM NEGERI** menyatakan :-
- (a) jumlah permohonan kewarganegaraan yang telah diluluskan sejak tahun 2013-2016 berdasarkan negeri dan kaum; dan
 - (b) apakah sebab proses permohonan kewarganegaraan menggunakan masa yang agak panjang dan ada banyak kes permohonan yang telah mengambil masa puluhan tahun tetapi masih tidak dilulus.
17. PR-1343-L76839
Dato' Sri Bung Moktar bin Radin [Kinabatangan] minta **MENTERI KESIHATAN** menyatakan apakah tindakan yang telah dan akan diambil bagi memastikan masalah wabak Denggi dan Zika di seluruh negara dapat diatasi secara total.

18. PR-1343-L76236
Tuan Sim Tze Tzin [Bayan Baru] minta **MENTERI KOMUNIKASI DAN MULTIMEDIA** menyatakan jumlah cukai GST kad prabayar syarikat telco yang dikutip oleh Kerajaan sejak 1 Januari 2016 sehingga sekarang. Siapakah yang membiayai rebate GST yang diberikan kepada pengguna, Kerajaan atau syarikat telco.
19. PR-1343-L76032
Datuk Koh Nai Kwong [Alor Gajah] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah status pemasangan kamera litar (CCTV) di seluruh negara dan pencapaian menurunkan kes jenayah sebelum dan selepas pemasangan CCTV dan langkah drastik yang akan dijalankan oleh Kementerian untuk menyelaraskan isu yang timbul daripada CCTV seperti yang dinyatakan agar matlamat Kerajaan untuk menurunkan kadar jenayah tercapai.
20. PR-1343-L77300
Dr. Ong Kian Ming [Serdang] minta **MENTERI DALAM NEGERI** menyatakan jumlah pendakwaan untuk percubaan bunuh diri di bawah Seksyen 309 Kanun Keseksaan dari tahun 2010 hingga sekarang dan sama ada Menteri berpendapat bahawa Seksyen 309 patut dipinda oleh kerana ia tidak berapa berkesan.
21. PR-1343-L75555
Tuan Budiman bin Mohd. Zohdi [Sungai Besar] minta **MENTERI PENDIDIKAN TINGGI** menyatakan perkembangan semasa serta impak yang diperolehi oleh pelajar melalui Program Fakulti CEO dengan membawa masuk pemimpin industri sebagai *Adjunct Professors* ke pusat pengajian di bawah Pelan Pembangunan Pendidikan Malaysia 2015-2025 (Pengajian Tinggi).
22. PR-1343-L77071
Tuan Gooi Hsiao-Leung [Alor Setar] minta **MENTERI PENDIDIKAN** menyatakan perkembangan susulan kenyataan umum Perdana Menteri bertarikh 23.7.2016 mengarahkan Menteri-menteri MCA dan parti-parti Cina dalam Barisan Nasional untuk menyakinkan Kementerian Pendidikan dan Kementerian Pengajian Tinggi untuk pengiktirafan Unified Examination Certificate (UEC) yang bercanggah dengan kenyataan Timbalan Menteri Pendidikan, Chong Sin Woon, bertarikh 8.5.2016 bahawa UEC akan diiktirafkan dalam masa terdekat.
23. PR-1343-L77360
Dato' Ahmad Fauzi bin Zahari [Setiawangsa] minta **MENTERI KESIHATAN** menyatakan apakah bentuk kerjasama dengan pihak berkuasa tempatan negeri-negeri yang mempunyai pintu masuk ke Malaysia dari luar negara bagi membendung penularan wabak Zika pada kali ini.
24. PR-1343-L76632
Dr. Mohd Hatta bin Md. Ramli [Kuala Krai] minta **MENTERI KEWANGAN** menyatakan berapakah jumlah peratus yang diperuntukkan bagi perbelanjaan pengurusan, perbelanjaan awam, membayar hutang negara dan lain-lain hasil GST sepanjang perlaksanaannya.

25. PR-1343-L75955
Datuk William @ Nyallau anak Badak [Lubok Antu] minta **PERDANA MENTERI** menyatakan setakat mana kemajuan perbincangan jawatankuasa teknikal mengenai tuntutan Negeri Sarawak Hak-Hak Negeri seperti termaktub di dalam Perjanjian Malaysia tahun 1963 (MA63).
26. PR-1343-L75617
Laksamana Pertama Mohamad Imran bin Abd Hamid (B) [Lumut] minta **MENTERI PERTAHANAN** menyatakan kedudukan sekolah Pertukangan Perantis Tentera Darat/ Sekolah Pertukangan Perantis Angkatan Tentera akan diteruskan atau akan diubah kepada versi baru yang dapat membantu memenuhi keperluan sumber manusia ATM untuk sepuluh hingga 40 tahun akan datang sebagaimana SPPTD telah sumbangkan kepada ATM sejak ditubuhkan pada tahun 1968 oleh Menteri Pertahanan Almahrum Tun Hji Abdul Razak Hussein ketika itu.
27. PR-1343-L75539
Dato' Sri Hasan bin Malek [Kuala Pilah] minta **MENTERI BELIA DAN SUKAN** menyatakan apakah terdapat beberapa bentuk faedah galakan dan apakah inisiatif serta langkah jangka panjang Kementerian Belia dan Sukan dalam menggalakkan program yang melibatkan belia seperti "MyCorp".
28. PR-1343-L76204
Tuan Nga Kor Ming [Taiping] minta **MENTERI PERDAGANGAN ANTARABANGSA DAN INDUSTRI** menyatakan apakah tindakan dan rancangan segera yang akan diambil untuk mengatasi kemerosotan daya saing negara yang diumumkan oleh *World Economic Forum (WEF)* pada bulan September dimana kedudukan Malaysia telah jatuh dari tangga 18 ke 25 pada tahun ini.
29. PR-1343-L76462
Tuan Che Mohamad Zulkifly bin Jusoh [Setiu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan langkah kawalan bagi memastikan harga jualan rumah tidak melambung tinggi di negara ini.
30. PR-1343-L76656
Dr. Hajah Siti Mariah binti Mahmud [Kota Raja] minta **PERDANA MENTERI** menyatakan langkah konkrit yang akan atau telah diambil untuk memastikan tidak berlaku lagi perebutan hak penjagaan anak atau mayat dalam perbezaan agama apabila salah seorang pasangan memeluk agama Islam.
31. PR-1343-L76313
Tuan Nik Mohamad Abduh bin Nik Abdul Aziz [Pasir Mas] minta **MENTERI PENDIDIKAN TINGGI** menyatakan apakah ada kajian dilakukan bagi menentukan faktor sebenar yang menyebabkan kegagalan atau kelewatan para peminjam bagi melunaskan hutang PTPTN.

32. PR-1343-L76930
Tuan V. Sivakumar [Batu Gajah] minta **MENTERI SUMBER MANUSIA** menyatakan jumlah pekerja-pekerja yang dibuang kerja di sektor bank dan institusi-institusi kewangan yang lain pada tahun 2015 dan 2016. Apakah punca-punca pembuangan pekerja di sektor kewangan seluruh negara.
33. PR-1343-L77180
Dr. Michael Teo Yu Keng [Miri] minta **MENTERI DALAM NEGERI** menyatakan :-
- (a) berapakah bilangan individu yang dilahirkan di Malaysia yang masih dalam golongan "stateless" yang telah membuat permohonan untuk mendapatkan kewarganegaraan Malaysia; dan
 - (b) berapakah bilangan permohonan tersebut yang belum diluluskan.
34. PR-1343-L76589
Dr. Azman bin Ismail [Kuala Kedah] minta **MENTERI PENGANGKUTAN** menyatakan secara terperinci segala perkembangan berkenaan siasatan tragedi MH370. Benarkah yang pihak Malaysia kerap keberatan berkongsi maklumat dengan keluarga mangsa.
35. PR-1343-L77134
Dato' Johari bin Abdul [Sungai Petani] minta **MENTERI WILAYAH PERSEKUTUAN** menyatakan :-
- (a) Kerajaan telah umumkan bahawa Kawasan Hijau sekitar Tugu Negara dan Tasik Perdana di Kuala Lumpur akan dibangunkan semula. Berapa kos yang dianggarkan dalam membangunkan projek ini; dan
 - (b) apakah kaedah yang akan digunakan agar kawasan ini dimanfaatkan oleh orang awam dan tidak jatuh kepada pihak swasta yang akan mengaut keuntungan dan sekaligus kawasan hijau ini akan pupus.
36. PR-1343-L75974
Tuan M. Kulasegaran [Ipoh Barat] minta **PERDANA MENTERI** menyatakan bilakah cadangan/syor Suruhanjaya Hak Asasi Manusia (SUHAKAM) dalam laporan Inkuri Nasional Mengenai Hak Tanah Orang Asli/Asal 2013 untuk menubuhkan Tribunal ataupun Suruhanjaya Tanah Orang Asal (Syor Ke-4) sebagai mekanisme keadilan (*redress mechanism*) akan dilaksanakan oleh Kerajaan supaya pertelingkahan tanah Orang Asal dapat diselesaikan dengan berkesan.
37. PR-1343-L77332
Tuan Liew Chin Tong [Kluang] minta **PERDANA MENTERI** menyatakan mengenai projek kereta api laju KL-Singapura iaitu:-
- (a) jenis model pembiayaan projek serta kajian fisibiliti dan penilaian awal tapak; dan

- (b) anggaran harga tiket dan jangkaan penumpang-penumpang dalam lima tahun selepas bermula operasi.
38. PR-1343-L76155
Dato' Fauzi bin Abdul Rahman [Indera Mahkota] minta **MENTERI KEWANGAN** menyatakan adakah Kerajaan sedar dengan pemotongan dalam Belanjawan 2016 bagi sektor-sektor perkhidmatan '*prioriti*' seperti kesihatan dan pendidikan tinggi, kedua-dua perkhidmatan ini sangat terjejas dan merumitkan masyarakat marhaen dan berpendapatan rendah. Apakah langkah-langkah Kerajaan untuk memperbaiki keadaan ini.
39. PR-1343-L75904
Dato' Sri Dr. Haji Irmohizam bin Haji Ibrahim [Kuala Selangor] minta **MENTERI DALAM NEGERI** menyatakan setakat hari ini, berapakah statistik terkini penjenayah yang dikehendaki di seluruh negara dan apakah tindakan pihak berkuasa dalam menjejaki penjenayah-penjenayah ini.
40. PR-1343-L75600
Datuk Linda Tsen Thau Lin [Batu Sapi] minta **PERDANA MENTERI** menyatakan cara-cara untuk merangsang ekonomi di negeri Sabah.
41. PR-1343-L77320
Tuan Julian Tan Kok Ping [Stampin] minta **MENTERI PENGANGKUTAN** menyatakan jumlah trafik penumpang yang menggunakan Kuching International Airport (KIA) semenjak tahun 2008 sehingga kini. Senaraikan secara terperinci daripada segi penerbangan domestik ataupun antarabangsa. Nyatakan laluan udara antarabangsa yang DCA luluskan bagi syarikat penerbangan beroperasi dari KIA serta laluan antarabangsa yang sedia wujud di KIA.
42. PR-1343-L76172
Puan Alice Lau Kiong Yieng [Lanang] minta **MENTERI DALAM NEGERI** menyatakan :-
- (a) apakah tindakan terhadap pemilik premis perjudian mesin di Sarawak yang semakin banyak terutama di Sibu; dan
- (b) bilangan serbuan ke atas premis perjudian mesin di Sibu pada tahun 2011, 2012, 2013, 2014, 2015 dan 2016 serta bilangan kes yang dibawa ke mahkamah.
43. PR-1343-L76894
Tuan Loke Siew Fook [Seremban] minta **MENTERI DALAM NEGERI** menyatakan mengapa pihak Pendaftar Pertubuhan (ROS) belum lagi dapat menyelesaikan siasatan terhadap status pemilihan semula Jawatankuasa Tertinggi Pusat (CEC) Parti DAP pada 29 September 2013 dan bilakah ia dapat dimuktamadkan.

44. PR-1343-L75568
Datuk Dr. Makin @ Marcus Mojigoh [Putatan] minta **MENTERI KESIHATAN** menyatakan :-
- (a) dalam memerangi virus zika, apakah usaha pihak Kementerian dalam kempen kesedaran orang awam, kawalan serangga pembawa vektor, mengesan dan tindakan cepat dan menyelia dan kolaborasi dengan agensi Kerajaan yang lain dan pihak NGO ke arah usaha ini; dan
 - (b) berapa ramaikah mangsa yang telah dijangkiti virus zika serta yang melibatkan kematian menurut pecahan negeri di Malaysia.
45. PR-1343-L76601
Tan Sri Dato' Seri Abd Khalid bin Ibrahim [Bandar Tun Razak] minta **MENTERI PERDAGANGAN ANTARABANGSA DAN INDUSTRI** menyatakan semua usaha, masa dan nilai perbelanjaan yang telah dibuat sejak mula dalam proses pelaksanaan Perjanjian Perkongsian Trans-Pasifik (TPPA) dan perancangan lain demi menjamin kesinambungan perdagangan dan pelaburan antarabangsa Malaysia memandangkan TPPA dijangka gagal selepas pilihan raya Presiden Amerika Syarikat.
46. PR-1343-L76354
Tuan Wan Hasan bin Mohd Ramli [Dungun] minta **MENTERI TENAGA, TEKNOLOGI HIJAU DAN AIR** menyatakan apakah kewajaran penyambungan semula lesen penjanaan elektrik (PPA) kepada IPP Stesen Jana Elektrik YTL Paka walaupun perjanjian sewa tanah dengan TNB dan perjanjian pembelian bahan api dengan Petronas belum selesai lagi.
47. PR-1343-L77426
Tuan Manivanan a/l Gowindasamy [Kapar] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
- (a) apakah perkembangan dan status terkini secara terperinci untuk tempoh masa dari 1 Januari 2015 sehingga 30 September 2016 mengenai pembinaan sebuah balai bomba dan penyelamat di Parlimen Kapar khususnya di DUN Sementa dan/atau DUN Meru ; dan
 - (b) apakah Kerajaan Pusat berhasrat untuk memperoleh perlindungan insurans untuk setiap anggota bomba dan penyelamat selaraskan dengan risiko tugas dan tanggungjawab mereka.
48. PR-1343-L77462
Puan Nurul Izzah binti Anwar [Lembah Pantai] minta **MENTERI KESIHATAN** menyatakan rancangan memperbaiki nisbah doktor kepada penduduk dari 1:656 kepada 1:400 berdasarkan RMK-11 sebelum 2020, memandangkan hanya 44 hospital wujud untuk doktor pelatih yang menyebabkan graduan perubatan menunggu tiga hingga enam bulan untuk mendapat tempat sebagai doktor pelatih.

ATURAN URUSAN MESYUARAT DAN USUL-USUL

1. (D.R. 17/2016) **Rang Undang-undang Perbekalan 2017 – Menyambung semula perbahasan atas masalah, “ Bahawa Rang Undang-Undang ini dibacakan kali yang kedua sekarang, “ (1 November, 2016)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari empat puluh lapan bilion ringgit (RM48,000,000,000) dibelanjakan daripada Kumpulan Wang Pembangunan bagi tahun 2017, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2017, yang dibentangkan sebagai Kertas Perintah 25 Tahun 2016, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (1 November, 2016)

2. **Menteri di Jabatan Perdana Menteri akan mencadangkan:-**

“BAHAWA pada Selasa, 25 Oktober 2016 semasa sesi Kamar Khas, Yang Berhormat Lim Lip Eng, Ahli Parlimen Kawasan Segambut dengan biadapnya telah mempersoalkan kuasa Yang di-Pertua Dewan Rakyat yang boleh dikenakan ke atas beliau kerana enggan mengikut arahan Tuan Yang di-Pertua.

BAHAWA Yang Berhormat Segambut juga telah menghina Yang di-Pertua Dewan Rakyat dengan kenyataan “*You are a disgrace to Parliament.... we are elected and you are appointed*”. Kenyataan Yang Berhormat Segambut telah menghina Yang di-Pertua Dewan Rakyat dan Majlis Mesyuarat Dewan Rakyat yang telah memilih beliau sebagai Yang di-Pertua Dewan Rakyat berdasarkan Perkara 57 Fasal 1 Perlembagaan Persekutuan.

BAHAWA Yang Berhormat Segambut sebelum itu telah mengeluarkan satu kenyataan pada 23 Oktober 2016 yang mempertikaikan dan memperlekehkan keputusan Yang di-Pertua Dewan Rakyat berhubung dengan pertanyaan - pertanyaan serta usul yang berkaitan tindakan sivil *in rem* oleh Department of Justice mengenai isu *sub judice*.

BAHAWA Yang Berhormat Segambut juga telah mengeluarkan satu kenyataan semasa sidang media di lobi Parlimen pada Khamis, 7 April 2016 yang menyatakan bahawa Yang di-Pertua Dewan Rakyat gagal dalam usaha-usaha penambahbaikan Parlimen yang sedang dilaksanakan oleh Yang di-Pertua Dewan Rakyat dan meminta agar Yang di-Pertua Dewan Rakyat meletakkan jawatan.

DAN BAHAWA perbuatan dan kenyataan-kenyataan yang dibuat oleh Yang Berhormat Segambut itu adalah merupakan satu penghinaan kepada Tuan Yang di-Pertua Dewan Rakyat yang menjalankan tugas sebagai Pengerusi Dewan ini dan demikian bererti penghinaan juga kepada Dewan Rakyat yang turut mencemarkan nama baik dan prestij Dewan Rakyat.

MAKA INILAH DIPERSETUJUI BAHAWA Yang Berhormat Lim Lip Eng, Ahli Parlimen Kawasan Segambut hendaklah digantung daripada perkhidmatan Majlis Mesyuarat selama enam (6) bulan dari tarikh keputusan usul ini diluluskan.”

- | | | | |
|----|---------------|---|-----------------------------------|
| 3. | (D.R.18/2016) | Rang Undang-Undang Kewangan 2016 | Bacaan Kali Yang Kedua |
| | | [Menteri Kewangan] | |
| 4. | (D.R.13/2016) | Rang Undang-Undang Mahkamah (Kaedah-Kaedah Pemulaan Tindakan Sivil) 2016 | “ |
| | | [Menteri di Jabatan Perdana Menteri] | |
| 5. | (D.R.16/2016) | Rang Undang-Undang Pentadbiran Undang-undang Islam (Wilayah-Wilayah Persekutuan) (Pindaan) 2016 | “ |
| | | [Menteri di Jabatan Perdana Menteri] | |
| 6. | (D.R.15/2016) | Rang Undang-Undang Pendaftaran Kelahiran dan Kematian (Pindaan) 2016 | “ |
| | | [Menteri Dalam Negeri] | |

7. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan sebahagian pinjaman yang diberikan oleh Kerajaan Malaysia sebanyak RM500 juta kepada Small Medium Enterprise Development Bank Malaysia Berhad (SME Bank), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Lima Ratus Juta (500,000,000) unit saham biasa pada RM1 bagi satu unit saham”.

8. **Menteri Dalam Negeri** akan mencadangkan:-

“Bahawa Majlis ini membuat suatu ketetapan menurut sub-seksyen 4(11), Akta Kesalahan Keselamatan (Langkah-langkah Khas) 2012 supaya sub-seksyen 4(5), Akta ini hendaklah terus berkuatkuasa bagi tempoh 5 tahun lagi mulai dari 31 Julai 2017”.

9. **Dato' Seri Abdul Hadi bin Awang [Marang]** akan mencadangkan:-

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

i. menggantikan Seksyen 2 dengan seksyen berikut:

“**2.** Mahkamah Syariah akan mempunyai kuasa ke atas seseorang penganut agama Islam dan di dalam hal-hal kesalahan di bawah perkara-perkara yang disenaraikan di dalam Butiran 1 Senarai Negeri di bawah Jadual Kesembilan Undang-Undang Persekutuan.”; dan

ii. memasukkan selepas seksyen 2 dengan seksyen berikut:

“**2A.** Dalam menjalankan undang-undang jenayah di bawah Seksyen 2 Mahkamah Syariah berhak menjatuhkan hukuman yang dibenarkan oleh undang-undang syariah berkaitan hal-hal kesalahan yang disenaraikan di bawah seksyen yang disebutkan diatas, selain dari hukuman mati.”

[Menteri di Jabatan Perdana Menteri]

10. PR-1343-U75583

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kesan pemanasan global telah mencapai satu tahap yang amat serius di mana disebabkan peningkatan paras air laut, terdapat banyak sawah-sawah padi tidak lagi dapat ditanam dengan tanaman padi disebabkan sawah-sawah padi ini telah dicemari dengan air masin. Dan mengambil maklum juga bahawa kesan daripada fenomena ini, para petani terutama sekali mereka yang menanam padi di sawah-sawah padi yang berkedudukan tanah rendah atau pesisir pantai kehilangan punca pendapatan dan sekaligus kualiti hidup mereka turut terjejas. Dan mengambil maklum juga bahawa, sebagai langkah mitigasi bagi memulihkan ekonomi para petani ini, Kerajaan hendaklah membantu mereka dengan memperkenalkan tanaman bernilai komersial lain, yang sesuai ditanam di sawah yang dimasuki air masin tersebut seperti penanaman kelapa pandan dan sebagainya. Dan mengambil maklum juga bahawa penyediaan dan pengorekan perparitan untuk meninggikan paras tanah yang dimaksudkan di atas, di kawasan yang terlibat akan membolehkan kawasan yang terlibat tidak ditenggelami air masin. Maka, bagi menangani masalah ini, Dewan ini hendaklah mengambil ketetapan bahawa, di samping menangani isu pemanasan global secara serius, Kerajaan juga harus segera membantu para petani (atau pesawah padi) dalam mengusahakan semula sawah-sawah padi mereka yang terjejas oleh fenomena ini, dengan memperkenalkan tanaman bernilai komersial yang baru di tanah tersebut."

[Menteri Pertanian dan Industri Asas Tani]

11. PR-1343-U75584

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa dengan purata hujan tahunan negara kini telah meningkat sering kita dengar tentang keadaan banjir kilat yang telah banyak menyebabkan kemusnahan harta benda, ameniti sosial, kerosakan alam sekitar dan lain-lain yang menjangkau jutaan ringgit nilainya. Dan mengambil maklum juga bahawa keadaan banjir ini ditambah burukkan lagi di mana banyak kolam dan paya ditimbus bagi pembangunan hartanah dan sebagainya. Ini menyebabkan sungai-sungai dan terusan tidak lagi dapat menampung jumlah air yang mengalir secara mendadak. Dan mengambil maklum juga bahawa, sebagai langkah mitigasi, kolam-kolam air yang luas boleh diwujudkan dalam sesuatu kawasan bagi menampung air hujan lebat yang turun sebelum ianya mengalir ke sungai-sungai dan terusan, sekali gus dapat mengurangkan kejadian banjir kilat. Dan mengambil maklum juga bahawa, takungan air di kolam-kolam tadi boleh juga dirawat dan disalurkan ke empangan bekalan air yang mana boleh digunakan sebagai air terawat oleh para pengguna. Dan mengambil maklum juga bahawa air daripada takungan kolam itu juga boleh disalurkan kepada industri-industri yang memerlukannya di samping digunakan untuk menyiram tanaman atau taman-taman."

Maka, bagi menangani masalah banjir kilat ini, dewan yang mulia ini hendaklah mengambil ketetapan bahawa Kerajaan hendaklah mensyaratkan bahawa sebelum sesuatu zon itu dibangunkan, satu kawasan kolam takungan air hendaklah disediakan bagi maksud di atas."

[Menteri Sumber Asli dan Alam Sekitar]

12. PR-1343-U75585

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, ramai graduan serta lulusan sekolah menengah tidak berpeluang untuk mendapatkan kerja dan kebanyakan mereka ini akhirnya hanya berlegar di kampung masing-masing dan tidak berpendapatan. Dan mengambil maklum juga bahawa, masih banyak peluang-peluang perniagaan yang boleh diusahakan di kampung-kampung sekiranya mereka yang berminat mendapat latihan, bimbingan dan bantuan kewangan yang secukupnya. Dan mengambil maklum juga bahawa pihak Kerajaan telah beberapa kali mengutarakan program pembangunan desa seperti program satu kampung satu industri, namun belum ada lagi program seumpamanya yang benar-benar berjaya. Dan mengambil maklum juga bahawa kebanyakan bekalan bahan mentah bagi penghasilan produk makanan, herba, tenusu dan lain-lain lagi boleh didapati di kampung-kampung dengan mudah. Dan mengambil maklum juga bahawa, melalui program "cottage industry" bukan sahaja penduduk kampung yang terlibat dalam program ini akan mendapat manfaat, malah negara secara keseluruhannya akan mendapat manfaat daripada aliran aktiviti ekonomi yang dijana. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan merumuskan satu mekanisme yang lebih efektif bagi menggalakkan penglibatan penduduk kampung dalam aktiviti "cottage industry" yang mana akan dapat membawa manfaat kepada 15-20 orang daripada setiap kampung."

[Menteri Kemajuan Luar Bandar dan Wilayah]

13. PR-1343-U75586

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kos sara hidup keluarga telah meningkat dengan mendadak dan ini dapat dirasakan begitu hebat sekali oleh mereka daripada golongan berpendapatan rendah. Dan mengambil maklum juga bahawa teknologi solar yang terdapat pada hari ini dapat membekalkan tenaga elektrik dengan murah dan mesra alam. Dan mengambil maklum juga bahawa kadar penurunan hujan di negara ini agak tinggi dan boleh membekalkan bekalan air mentah yang cukup sekiranya ditadahkan dan disimpan dengan baik.

Maka, bagi meringankan kos sara hidup keluarga terutama sekali mereka yang dari golongan berpendapatan rendah, Dewan yang mulia ini hendaklah mengambil ketetapan bahawa, semua pembinaan PPRT yang baru hendaklah dilengkapi dengan sistem tenaga solar dan tangki tadahan air bagi membolehkan pemilik rumah tersebut menurunkan sedikit kos sara hidup keluarga mereka."

[Menteri Kesejahteraan Bandar, Perumahan dan Kerajaan Tempatan]

14. PR-1343-U75587

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat desas-desus bahawa pencarum Kumpulan Wang Simpanan Pekerja (KWSP) yang masih menabung dalam KWSP, yang telah mencapai umur 75 tahun, yang dikatakan mencecah jumlah 260,000 orang, tidak lagi dibayar dividen ke atas simpanan mereka di dalam KWSP, seperti yang disiarkan oleh akhbar The Sun Daily. Dan mengambil maklum juga bahawa, kekeliruan ini adalah disebabkan oleh polisi KWSP yang dikeluarkan pada tahun 2008, melalui Akta KWSP 1991 yang menerangkan bahawa simpanan para pencarum yang telah mencapai umur 75 tidak akan dibayar dividen. Dan mengambil maklum juga bahawa para pesara yang masih menyimpan akaun dengan pihak KWSP masih memerlukan sumber pendapatan yang terurus dengan kadar pulangan yang baik dan KWSP dikatakan memberikan kadar pulangan yang baik serta terjamin selamat. Maka, bagi menangani masalah ini dan membela nasib para pendeposit KWSP yang dimaksudkan, Dewan yang mulia ini hendaklah mengambil ketetapan bahawa Kerajaan hendaklah segera meminda Akta 1991 dan membatalkan polisi KWSP 2008 bagi memastikan agar para pencarum atau penabung KWSP menerima dividen selagi mereka masih mempunyai akaun yang aktif dengan KWSP."

[Menteri Kewangan]

15. PR-1343-U75588

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kos barangan dan kos sara hidup di negeri Sabah adalah antara yang tertinggi di negara ini dan polisi kabotaj, dikatakan sebagai antara penyebab utama keadaan ini berlaku. Dan mengambil maklum juga bahawa, akibat polisi kabotaj ini, kapal-kapal dagang dari luar negara tidak dibenar memunggah dan mengangkut barangan dari mana-mana pelabuhan di Malaysia kecuali di Pelabuhan Klang. Ini menyebabkan barangan tersebut terpaksa di angkut semula dengan kos tambahan ke pelabuhan-pelabuhan di negeri Sabah dan Sarawak. Dan mengambil maklum juga bahawa disebabkan polisi kabotaj ini, kadar caj penghantaran antara pelabuhan ditetapkan oleh pihak perkapalan dengan kawalan terhad oleh pihak Kerajaan. Misalnya, caj penghantaran kontena 20 kaki dari pelabuhan Klang ke pelabuhan Kota Kinabalu ialah RM2,436, ke pelabuhan Sandakan RM3,235 dan ke pelabuhan Tawau RM3,336.

Ternyata caj ini adalah terlalu tinggi jika dikira dari segi jarak batu nautika antara pelabuhan berbanding dengan caj penghantaran di pelabuhan-pelabuhan lain. Maka, bagi menangani masalah ini serta mengimbangi harga barangan dan kos sara hidup di negeri Sabah, Dewan yang mulia ini hendaklah mengambil ketetapan bahawa Kerajaan hendaklah segera membatalkan polisi kabotaj ini bagi meringankan beban rakyat Sabah dan Sarawak khususnya."

[Menteri Kewangan]

16. PR-1343-U75589

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kebanjiran warga asing ke negara ini telah membawa budaya yang kurang baik di negara ini di mana mereka dengan sewenang-wenangnya membuang sampah merata-rata dan ini dapat kita lihat di kota-kota besar pada hujung minggu di mana mereka ini keluar beriadah. Dan mengambil maklum juga bahawa, sejak akhir-akhir ini, penduduk tempatan juga telah mula dijangkiti dengan sikap kutu sampah yang dimaksudkan di atas, di mana penduduk tempatan juga mula membuang sampah merata-rata. Dan mengambil maklum juga bahawa penularan pelbagai jenis penyakit bawaan vektor, tikus, lipas dan lalat, pembuangan sampah merata-rata telah menambah-burukkan lagi ancaman kesihatan di negara ini. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah memindah undang-undang bagi menghukum kutu-kutu sampah dengan hukuman lebih berat lagi disamping menggalakkan lebih banyak usaha untuk kitar semula dijalankan."

[Menteri Kesejahteraan Bandar, Perumahan dan Kerajaan Tempatan]

17. PR-1343-U76223

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1 MDB (1 Malaysia Development Bhd) dibentang dan dikemukakan untuk perbincangan di Dewan Rakyat dengan kadar segera."

[Perdana Menteri]

18. PR-1343-U76225

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

[Perdana Menteri]

19. PR-1343-U76226

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya mengesyorkan kepada DYMM Seri Paduka Baginda Yang Di Pertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera."

[Perdana Menteri]

20. PR-1343-U76228

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

[Perdana Menteri]

21. PR-1343-U77356

Tuan M. Kulasegaran [Ipoh Barat] akan mencadangkan:-

"Bahawa Dewan ini mengambil maklum, Parlimen sepatutnya mengambil maklum kes penembakan Lucus a/l Asirvatham dari Ipoh semasa bekerja di kebunnya di Chemor Perak pada 11 Ogos 2016 oleh seorang bekas pegawai kanan polis. Kes penembakan tersebut perlu disiasat secara ketat dan efektif melalui penubuhan sebuah badan jawatankuasa yang bebas dan integriti serta laporannya diumumkan kepada orang ramai (made public)."

[Menteri Dalam Negeri]

22. PR-1343-U75910

Dr. Tan Seng Giaw [Kepong] akan mencadangkan:-

"Bahawa Dewan ini membahaskan langkah-langkah untuk mencegah pengganas di Malaysia."

[Menteri Dalam Negeri]

23. PR-1343-U75911

Dr. Tan Seng Giaw [Kepong] akan mencadangkan:-

"Bahawa Dewan ini memperbincangkan dasar penyelenggaraan semua jenis pengangkutan di negara".

[Menteri Pengangkutan]

24. PR-1343-U75794

Tuan Fong Kui Lun [Bukit Bintang] akan mencadangkan:-

"Bahawa Kerajaan mempergiatkan usaha untuk meyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 59 tahun lalu supaya mereka boleh hidup dengan aman dan saling memerlukan dan memahami antara satu sama lain bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

25. PR-1343-U75795

Tuan Fong Kui Lun [Bukit Bintang] akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

26. PR-1343-U75707

Tuan Loke Siew Fook [Seremban] akan mencadangkan:-

"Bahawa Dewan ini merakamkan sekalung tahniah dan setinggi-tinggi penghargaan kepada wira dan wirawati negara yang telah mengharumkan nama negara di Sukan Paralimpik dan Olimpik 2016 di Rio De Janerio. Kejayaan Mohamad Ridzuan Mohamad Puzi acara 100 meter, Muhammad Ziyad Zolkefli acara lontar peluru dan Abdul Latif Romly acara lompat jauh merangkul tiga pingat emas pertama untuk Malaysia dalam Sukan Paralimpik serta dua rekod dunia yang dicapai oleh mereka adalah satu kejayaan yang luar biasa dan sangat membanggakan. Atlet wanita Siti Noor Radiah Ismail yang memenangi pingat gangsa dalam acara lompat jauh di Sukan Paralimpik juga merupakan satu pencapaian yang membanggakan. Dewan ini juga merakamkan ucapan setinggi-tinggi tahniah terhadap atlet-atlet negara yang memenangi 4 pingat perak dan 1 pingat gangsa di Sukan Olimpik Rio 2016 iaitu pemenang pingat perak dalam acara badminton perseorangan lelaki Dato Lee Chong Wei, badminton beregu lelaki Goh V Shem-Tan Wee Kiong, badminton beregu campuran Chan Peng Soon-Goh Chan Ying dan pemenang pingat perak dalam acara terjun Pandeleta Rinong-Chan Jun Heong serta pemenang pingat gangsa acara berbasikal keirin Azizulhasni Awang. Atlet-atlet tersebut telah mencapai keputusan yang terbaik untuk kontijen Malaysia dalam sejarah penyertaan negara dalam Sukan Olimpik dan kejayaan tersebut harus dibanggakan oleh seluruh rakyat Malaysia."

[Menteri Belia dan Sukan]

27. PR-1343-U77348

Tuan Liew Chin Tong [Kluang] akan mencadangkan:-

"Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2016, anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM5.9 bilion dan RM14 bilion yang membawa kepada jumlah keseluruhan RM20 bilion."

[Menteri Kewangan]

28. PR-1343-U77349

Tuan Liew Chin Tong [Kluang] akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

[Perdana Menteri]

29. PR-1343-U77437

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Dalam Negeri]

30. PR-1343-U77438

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

31. PR-1343-U77439

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

32. **Tuan Gobind Singh Deo [Puchong]** akan mencadangkan:-

Pada 17.10.2016, Tuan Yang Di-Pertua telahpun membuat keputusan di dalam Dewan Rakyat seperti berikut:

Jadi masa tidak lagi mengizinkan. Jadi sesi pertanyaan-pertanyaan bagi jawapan lisan berakhir dan sebelum saya memanggil Setiausaha untuk beredar ke urusan mesyuarat yang lain, ada satu perkara mustahak yang ingin saya umumkan iaitu Ahli-ahli Yang Berhormat **saya mendapati beberapa soalan dalam pertanyaan jawapan lisan dan bertulis serta usul yang telah dikemukakan bagi Mesyuarat Ketiga Penggal Keempat Parlimen Ketiga Belas kali ini berkaitan dengan satu isu yang menjadi kegemaran ahli-ahli Yang Berhormat iaitu isu tindakan sivil in rem oleh Jabatan Keadilan Amerikat Syarikat atau singkat DOJ.**

Jadi untuk mengelakkan lagi satu pertuduhan seperti di sesi yang lalu iaitu di mana soalan yang perlu dijawab secara lisan oleh kerana tidak ada masa untuk dijawab pada ketika itu, maka Menteri menjawab mengatakan bahawa tidak payalah dijawab secara bertulis oleh kerana itu adalah *sub judice*.

Jadi dalam hal ini, dalam sesi ini juga ada perkara-perkara yang sedemikian. Jadi saya tidak mahu lagi timbul satu persepsi di mana Menteri akan dituduh bahawa dia *assumed the role of Speaker*. **Jadi untuk itu setelah meneliti isi kandungan pertanyaan-pertanyaan tersebut, saya mendapati bahawa ia adalah perkara yang masih dalam timbangan mahkamah ataupun sub judice. Oleh itu Menteri yang berkenaan tidak perlu jawab kepada perkara-perkara tersebut.**

Manakala kepada Ahli-ahli Yang Berhormat yang sedemikian untuk memuaskan hati mereka saya akan sampaikan setiap Ahli Yang Berhormat keputusan saya secara bertulis. Terima kasih. Sila.

Dengan hormatnya, saya usulkan supaya keputusan Tuan Yang Di-Pertua tersebut dikaji semula menurut Peraturan 43 Peraturan Majlis Mesyuarat di atas alasan-alasan berikut:

- (i) Peraturan yang menghalang pertanyaan oleh kerana sub judice tidak terpakai kepada kes-kes di luar Malaysia.
- (ii) Oleh yang demikian, tindakan *civil in rem* oleh Jabatan Keadilan Amerika Syarikat tidak boleh menjadi asas untuk penolakan soalan ataupun seseorang Menteri dikecualikan daripada menjawab soalan tersebut atas alasan perkara itu sub judis.
- (iii) Perkara ini dibincangkan dalam "Buku Erskine May's Treaties on The Law, Privileges, Proceedings and Usage of Parliament 24th Edition 2011" di mana 365 dimukasurat disebut seperti berikut:

Matters sub judice

By a resolution of the House, cases in which proceedings are active in United Kingdom courts shall not be referred to in any motion, debate or question (see pp 396, 441-443); though the House has further resolved to give Chair some discretion to allow reference to be made to matters awaiting or under jurisdiction in all civil courts in certain specified circumstances, **provided that there is no real and substantial danger of prejudice to the proceedings**. The 'sub judice rule' as it is called, also applied to matters before a coroner's court or a Fatal Accident Inquiry. If the subject-matter of the question is found to be, or become, sub judice of the questions has been given, the Member is asked to withdraw it, or the Speaker may direct it to be removed from the notice paper or refuse to allow it to be asked if it is on the Order Paper.

The rule does not apply to matters which are sub judice in courts of law outside Great Britain and Northern Island, nor to matters which are the subject of administrative inquiry.

- (iv) jadi dengan segala hormatnya, jelas bahawa keputusan Tuan Speaker yang berasaskan kepada alasan sub judice adalah bertentangan dengan praktis yang diamalkan berkenaan isu itu dan oleh yang sedemikian boleh dan perlu dikaji semula.
2. Seterusnya dengan merujuk kembali lagi kepada petikan di dalam buku Erskine May di atas adalah jelas bahawa **sekiranya pun prosiding tersebut di dalam negara ini**, Tuan Speaker dalam memutuskan isu sama ada ataupun tidak perkara ini dihalang kerana sub judice perlu menilai sama ada wujud ataupun tidak "*real and substantial danger of prejudice*" kepada prosiding tersebut.
- (i) Dengan segala hormatnya untuk menimbang dan seterusnya membuat keputusan berkenaan perkara itu, saya berpendapat bahawa Tuan Speaker perlu:

- (a) memberikan Ahli-ahli Parlimen peluang untuk didengar sebelum membuat sebarang keputusan berkenaannya.
 - (b) menyakinkan diri dengan rujukan penuh kepada prosiding Mahkamah tersebut dan seterusnya menimbangkan kesan soalan-soalan yang ditanya kepada prosiding tersebut sebelum membuat keputusan tersebut.
- 2 (ii) Di dalam hal ini, saya memohon supaya Tuan Speaker menjelaskan sama ada ataupun tidak Tuan Speaker ada salinan dan sudah menimbangkan dengan mendalam semua kertas-kertas kuasa dalam prosiding DOJ tersebut (iaitu tuntutan dan jawapan-jawapan kepadanya sekiranya ada) untuk menyakinkan diri Tuan Speaker berkenaan fakta-fakta serta isu-isu yang berbangkit dalam perkara itu untuk membuat keputusan bahawa soalan-soalan itu adalah dihalang oleh perkara *sub judice*.
- 3 (i) seterusnya saya dengan segala hormatnya memohon rujuk kepada Peraturan 36(1) dan 23(1)(g) Peraturan Mesyuarat Dewan Rakyat di mana cukup jelas bahawa perkara yang perlu diputuskan adalah:
- 23(1)(g) A question shall not be so drafted as to be likely to prejudice a case under trial, or be asked to any matter **which is sub judice**; dan
- 36(2) Reference shall not be made to any matter which is sub judice in such a way might in the opinion of chair ***prejudice the interests of parties thereto***”
- 3 (ii) Dengan segala hormatnya, menurut Peraturan tersebut Tuan Speaker perlu untuk menentusahkan “parties” kepada tindakan ini dan kepentingan mereka sebelum keputusan berkenaan prejudis yang mungkin timbul seakibat soalan yang diajukan itu.

Tuan Speaker,

Negara kami dilanda krisis dan segi wujudnya satu perkara yang melibatkan wang yang sangat besar yang kini menjadi topik perbincangan hangat bukan sahaja di Malaysia tetapi di seluruh dunia.

Perkara ini telahpun menyebabkan tindakan yang tegas diambil oleh negara-negara seperti Singapura, United Kingdom dan Amerika Syarikat manakala di negara kita tiada sebarang tindakan berkesan diambil terhadap mana-mana pihak sama sekali sehingga sekarang.

Perkara ini telahpun menyebabkan banyak soalan ditanya oleh rakyat Malaysia khususnya berkenaan corak pentadbiran Kerajaan kami dan pengendalian siasatan perkara ini oleh jabatan-jabatan seperti Jabatan Peguam Negara, PDRM dan SPRM.

Isu ini sudah semestinya menjadi satu isu berkepentingan awam dan amat sangat perlu dibahaskan di dalam Dewan Rakyat.

Keputusan Tuan Speaker dengan segala hormatnya mempunyai kesan menghalang perkara ini daripada dibahaskan secara transparan dan juga memprejudiskan kesemua pihak dengan amat sangat oleh kerana mereka kehilangan peluang untuk menyoal dan menjelaskan semua keraguan yang timbul di dalam Dewan Rakyat yang mulia ini untuk pengetahuan rakyat Malaysia secara keseluruhannya.

Saya juga merayu kepada Tuan Speaker supaya melihat kepada “precedent” yang akan dicapai melalui keputusan ini di mana daripada sekarang, mudah sekali untuk sesiapa menghalang sesuatu perkara itu dibangkitkan di Dewan Rakyat iaitu dengan memfailkan atau merujuk kepada prosiding di luar negara untuk tujuan itu.

Ini kepada saya bukan niat ataupun matlamat yang ingin dicapai oleh Peraturan Mesyuarat yang digubal untuk “enhance” dan bukannya “restrict” dengan izin, perbahasan perkara-perkara penting untuk negara kita di dalam Dewan Rakyat yang mulia ini.

Maka saya selaku Ahli Parlimen Puchong merayu supaya usul saya dibenarkan dibahas dan keputusan Tuan Speaker itu, dikaji semula dan diketepikan dengan serta merta.

[Perdana Menteri]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

| <u>TAHUN</u> <u>2016</u> | <u>RISALAT/DOKUMEN</u> | <u>TARIKH</u> <u>DIBENTANGKAN</u> |
|---|---|--|
| DR.5 | Laporan Jawatankuasa Kira-Kira Wang Negara - Pengurusan Lesen Iklan / Papan Tanda Di Kuala Lumpur | 2 November 2016 |
| ST.84 | Laporan Tahunan dan Penyata Kewangan Kumpulan Wang Amanah Negara (KWAN) Bagi Tahun 2015. | 2 November 2016 |
| ST.98 | Laporan Tahunan dan Penyata Kewangan Perbadanan Pr1ma Malaysia Bagi Tahun 2015. | 2 November 2016 |

****UCAPAN**
(PERATURAN MESYUARAT 17 BAHARU)
(KAMAR KHAS)

| Tarikh Ucapan | Ahli Yang Berucap | Tajuk Ucapan | Menteri Yang Bertanggungjawab |
|------------------------|--|--|--------------------------------------|
| 1. 2.11.2016 (Rabu) | 1. YB Tuan Oscar Ling Chai Yew (Sibu) | 1. Keperluan untuk Menaiktaraf Atau Membesarkan Hospital Kapit Yang Dipandang Ringan Oleh Pihak Kerajaan | 1. YB Menteri Kesihatan |

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**